




Literatura den Bon Dia

Ernesto E. Rosenstand



TUR COS A KEDA ATRAS

Hopi hende a gab'e cu e ta un bunita pais. Su hendenan ta amabel y cariñoso. Ei lo e pasa un bon vacante. Den e kietud y bunitesa di e lugar lo e haya forsa pa continua cu su bida. Traha plannan nobo y purba organisa su bida manera debe ser. P'esei el a dicidi di bai pasa algun siman aya. Y berdad e tabata sintie bon, principalmente el a gusta e capital – San Jose.

Maske e interior di e pais tambe tabata bunita. Su naturalesa tabata sin igual. E dlanan cu e tabata pasa aki tabata hacie bon. No a dura mucho cu el a cuminsa gana peso y su colo a cuminsa habri. Recuerdonan a cuminsa desaparece. Bida a cuminsa haya atrobe sentido.

E pesimismo di delaster tempo a cuminsa desaparece. Pa prome biaha despues cu Carmen a bai e tabata sintie contento. Te asta bo por bisa, felis. Maske tabata otro felicidad. Ma en todo caso un sentimento cu delaster tempo e no a yega di sinti.

Bida a cuminsa haya motibo pa gos'e. Sanguer a cuminsa core mas lihe dor di su venanan. E tabata sintie cu mas energia. Cu mas gana di enfrenta bida. Cu mas gana di biba.

29

Ma ai! Atrobe destino tabata persiguie. Parce cu e no por a haya calma. E no por a haya sosiego. Esei el a bin experiencia sin spera.

Riba un anochi fresco, despues di a keiro poco e tabatin intencion di bai su hotel. Desbentaha ora bo biaha so ta cu hopi biaha maske bo ta pasa bon, bo ta sinti bo so. No sa ki haci, ni unda bai.

Esei ta un di e desbentahanan cu tin ora cu bo biaha so. Y bo bai un luga unda bo no conoce mucho hende. Berdad cu bo ta haci conoci, ma no ta tur ora por ta cu otro.

E no tabata sa kico tabata pas'e. E tabatin un sensacion masha straño. Esei tabata prome biaha cu el a sintie durante su vacante. Un precentimento hopi fuerte. Cu e no por a compronde.

E mes no por a compronde kico tabata molestie. Ma e sensacion aki e no a yega di sinti. E no tabata uno normal. Uno dificil pa splica, ma e tabata t'ei.

Y pa refresca poco el a dicidi di drenta un bar cu tabata keda cerca. Na e hotel e no tabatin nada di haci. Sikiera na e bar e por topa un ke otro hende cu kende e por comborsa. Y mata tempo prome cu bai drumi.

E tabata muestra di tabata uno decente y limpi. Den asunto di bar mester tene cuidou ora ta den exterior. No ta tur ta limpi y decente. Esaki si tabata muestra bon.

E bar no tabata di e yen ei. Dilanti di e tonbank

tabatin varios homber sinta ta bebe. Y tabata hiba un combersacion basta anima. De bes en cuando e bartender tambe tabata hinca su boca di aden.

Y den e bar mes no tabatin di e hopi hende. E tabata nechi drecha y limpi tur caminda. No tabatin di e hopi lus. Esei mes tabata haci cu e ambiente tabata hopi ameno.

Aki aya bo tabata mira algun hende sinta ta bebe algo y comborsa, ma no asina anima manera esunnan na e bar mes.

Mayoria di hende e oranan ei tabata na cas ta come o sosega despues di un dia di trabou. Podise mas anochi lo e yena. E tabata bon situa tambe. Y tur cos tabata muestra cu hopi hende tabata sa bai ei.

Jacinto a bai sinta dilanti di e bentana grandi cu tabata keda cara pa caya. Asina e por a mira e hendenan cu tabata bai bin. Studia pasada di hende tambe por ta interesante. Na e momentonan ei bo ta ripara ta cuanto sorto di hende tin y con nan ta bai bisti. Tur esaki ta distrai bo.

Den caya si ainda bo tabata mira algun hende cana. No di e hopi ei. Tabata parce cu tur tabatin pura. Tur kier a yega nan cas lo mas pronto posibel. Y mirando e hendenan aki su pensamiento a bai Aruba.

Na Aruba na e oranan aki hendenan tambe tabata pura pa yega nan cas. Atrobe el a cuminsa pensa riba su bida cu a bai asina malo. Bida tabata asina malagradecido. Nunca e por a kere cu bida por ta asina cruel. Maske delaster dlanan durante su vakantie el a purba lague atras... tog. Ainda leu leu su pasado tabata torment'e.

Y ora cu e tabata pensa esaki un mucha mohe a bin puntr'e kico e kier. E tabata asina ocupa cu su pensamiento cu ni ripara el a ripara cu el a yega cerca dje. Y ora cu el a tende e stem asina cerca el a spanta.

El a bin bek den realidad. Y ora cu el a hisa su cara pa pidi un cerbes e no por a kere cu wowownan, El a spanta. Con por ta posibel?

Dilanti di su bentanan el a mira un mohe pasa cu un homber. E por a hura cu e mohe aki tabata Carmen. Unico cos tabata cu e no tabatin e frescura di poco añanan pasa. E tabata muestra bieu. Caba! Ma tog e tabata sigur cu e tabata Carmen. Por ta posibel?

E kier a sali bai mira, ma net e ora nan a trece e cerbes cu el a pidi. Y p'esei el a dicidi di keda. Podise loke el a mira tabata un vision... un deseo cu a keda personifica den e mohe cu a caba di pasa.

El a basha poco den su glas y mientras scuma tabata bin halto asina tambe su pasado tambe tabata bolbe rebiba den su mente. El a corda con pa prome biaha el a topa cu Carmen.

Tabata amor a primera bista. Asina el a mir'e el a pensa cu esei lo bai ta e amor di su bida. Esun cu por hacie felis. Con el a stim'e for di e momento ei. E oranan felis cu el a pasa cu ne. Tur e plannan cu e tabatin. Nan lo a haci esaki, nan lo a haci esaya.

E no por a bebe e cerbes na su gusto. Recuerdo y mas recuerdo tabata bombardea su cabes. Nan tabata brota fo'i su curpa, mescos cu lava fo'i un volcan. Y e pensamentonan aki tabata a torment'e atrobe.